


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-98	Al-Bayyinah	8	1	Madaniyyah	Ke-100	5





### **Zaman Diturunkan**

Surah al-Bayyinah adalah salah satu daripada 2 surah terakhir diturunkan kepada Rasulullah sebelum kewafatan Baginda di Madinah, selepas surah ini hanya Surah an-Nasr dan beberapa ayat yang lain sahaja diturunkan. Surah ini diagak telah turun pada akhir tahun ke-10 Hijrah.

### **Perkaitan Surah Al-Bayyinah Dengan Surah Sebelum Dan Selepasnya**

1. Surah al-Qadr sebelum ini menyebutkan tentang malam mula-mula wahyu diturunkan, Surah al-Bayyinah ini pula menyatakan tujuan kitab suci terakhir diturunkan kepada Rasul terakhir; Muhammad s.a.w., bahawa dengan penurunannya sempurnalah hujjah Allah kepada manusia di dunia melalui 2 saluran keturunan Nabi Ibrahim a.s., Bani Israil (Ahli Kitab) dan Bani Isma'il (orang-orang musyrikin Mekah). Mereka boleh menjadi خَيْرُ الْبَرِيَّةِ (sebaik-baik makhluk dan ahli syurga) dengan menerima Islam, dengan menolak Islam pula mereka boleh menjadi شَرُّ الْبَرِيَّةِ (seburuk-buruk makhluk dan ahli neraka).
2. Di dalam Surah az-Zilzaal selepas ini, untuk menyempurnakan hujjah di pihak Allah pada hari kiamat nanti, setiap manusia akan ditunjukkan hasil amalan baik dan buruknya.

### **Beberapa Kata Kunci Dan Tema Utama Surah**

1. Yang dimaksudkan dengan al-Bayyinah ialah Rasulullah s.a.w. sendiri yang menyeru orang ramai kepada ajaran al-Qur'an.
2. صُحُفٌ مُطَهَّرَةٌ, yang dimaksudkan dengan صُحُفٌ ialah al-Qur'an.
3. Orang-orang yang beriman kepada kitab al-Qur'an yang merupakan kitab suci terakhir dan beramal shaleh adalah خَيْرُ الْبَرِيَّةِ.
4. Orang-orang yang menolak dan tidak mempercayai kitab suci terakhir yang dibawa oleh Muhammad; Rasul terakhir adalah شَرُّ الْبَرِيَّةِ.
5. Orang-orang musyrikin Mekah (Bani Isma'il) dan Ahli Kitab (Bani Israil) daripada 2 cabang anak cucu Nabi Ibrahim tidak dapat tidak mesti menerima kitab suci terakhir dan rasul terakhir dengan beriman kepadanya dan beramal shaleh.
6. Melalui firman Allah ذَلِكَ لِمَنْ خَشِيَ رَبَّهُ dinyatakan hanya ahli خشية (orang-orang yang takut kepada tuhan) dari kalangan Bani Isma'il atau Bani Israil sahaja yang akan bertuah dan masuk syurga kerana percaya akan kitab suci terakhir dan rasul terakhir.